

წალკის მუნიციპალიტეტის საკრებულოს

დადგენილება №3

2011 წლის 11 თებერვალი

ქ. წალკა

წალკის მუნიციპალიტეტის გამგეობის კეთილმოწყობისა და ინფრასტრუქტურის განვითარების სამსახურის დებულების დამტკიცების შესახებ

„ადგილობრივი თვითმმართველობის შესახებ“ საქართველოს ორგანული კანონის 22-ე მუხლის პირველი პუნქტის „თ“ ქვეპუნქტისა და წალკის მუნიციპალიტეტის საკრებულოს დებულების (რეგლამენტის) მე-3 მუხლის მე-3 პუნქტის „ზ“ ქვეპუნქტის შესაბამისად.

1. დამტკიცდეს წალკის მუნიციპალიტეტის გამგეობის კეთილმოწყობისა და ინფრასტრუქტურის განვითარების სამსახურის დებულება (დანართი: 1 (2 ფურცელი)).

2. ეს დადგენილება ამოქმედდეს გამოქვეყნებისთანავე.

საკრებულოს თავმჯდომარე დ. მაჩიტაძე

შეტანილი ცვლილებები:

1. წალკის მუნიციპალიტეტის საკრებულოს 2011 წლის 4 მარტის დადგენილება №15 - ვებგვერდი, 17.03.2011წ.

დანართი

წალკის მუნიციპალიტეტის გამგეობის კეთილმოწყობისა და ინფრასტრუქტურის განვითარების სამსახურის დებულება

მუხლი 1. ზოგადი დებულებანი

1. წალკის მუნიციპალიტეტის გამგეობის კეთილმოწყობისა და ინფრასტრუქტურის განვითარების სამსახური (ტექსტში შემდგომ - სამსახური) არის მუნიციპალიტეტის გამგეობის სტრუქტურული ერთეული, რომელიც უზრუნველყოფს ეკონომიკური განვითარების მუნიციპალური პროგრამების შემუშავებასა და განხორციელებას, ასევე უზრუნველყოფს მუნიციპალური ინფრასტრუქტურის გამართულად ფუნქციონირებას და ახორციელებს ამ დებულებით განსაზღვრულ სხვა უფლებამოსილებებს;

2. სამსახური თავისი საქმიანობისას ხელმძღვანელობს „ადგილობრივი თვითმმართველობის შესახებ“ საქართველოს ორგანული კანონით, საქართველოს კანონებით, კანონქვემდებარე აქტებით, გამგეობის დებულებით, ამ დებულებით და წალკის მუნიციპალიტეტის სხვა სამართლებრივი აქტებით.

3. სამსახური ანგარიშვალდებულია წალკის მუნიციპალიტეტის გამგებლისა და საკრებულოს წინაშე.

4. სამსახურის საშტატო განრიგი განისაზღვრება გამგეობის საშტატო ნუსხით. სამსახურის მოხელეთა თანამდებობრივ სარგოებს კანონმდებლობით დადგენილი ნორმატივების ფარგლებში განსაზღვრავს მუნიციპალიტეტის საკრებულო.

წალკის მუნიციპალიტეტის საკრებულოს 2011 წლის 4 მარტის დადგენილება №15 - ვებგვერდი, 17.03.2011წ.

მუხლი 2. სამსახურის ფუნქციები და ამოცანები

სამსახურის ფუნქციები და ამოცანებია:

ა) მუნიციპალური ინფრასტრუქტურის - ადგილობრივი მნიშვნელობის გზების, ხიდების, გარე განათების, სანიაღვრე სისტემის, წალკის მუნიციპალიტეტის გამგებლობაში არსებული კომუნიკაციების შექმნა, რეაბილიტაცია და განვითარებასთან დაკავშირებული გეგმების და პროგრამების განხორციელება და კოორდინაცია;

ბ) მუნიციპალური ინფრასტრუქტურის ობიექტების შენახვა და მოვლა-პატრონობა;

- გ) მუნიციპალური ტრანსპორტის შექმნასთან, რეაბილიტაციასა და განვითარებასთან დაკავშირებული წინადადებების და პროგრამების შემუშავება და მათი განხორციელება;
- დ) წალკის მუნიციპალიტეტის დასახლებული ტერიტორიის კეთილმოწყობა, მასთან დაკავშირებული პროგრამების მომზადება და განხორციელება;
- ე) წინადადების შემუშავება გარე ვაჭრობისა და გარე რეკლამის რეგულირების შესახებ;
- ვ) წინადადების, დასკვნების და რეკომენდაციების შემუშავება მუნიციპალიტეტის დასახლებათა დასუფთავების, ნარჩენების გატანისა და უტილიზაციის საკითხებზე;
- ზ) ნარჩენების გატანისა და უტილიზაციის სამუშაოთა ორგანიზება;
- თ) მიწათსარგებლობის, საზოგადოებრივი მომსახურების, ტერიტორიის კეთილმოწყობის და დასუფთავების წესების დადგენა;
- ი) სასაფლაოების მოვლა-პატრონობა, შესაბამისი საზოგადოებრივი მომსახურების ორგანიზება;
- კ) წინადადებების მომზადება წალკის მუნიციპალიტეტის გამგებლობაში შემავალი საზოგადოებრივი მომსახურების ტარიფების განსაზღვრაზე, ასევე საკითხების მომზადება ამ მომსახურების მომწოდებლებს და მომხმარებლებს შორის ხელშეკრულების მომზადების თაობაზე;
- ლ) წინადადებების მომზადება დასუფთავების მოსაკრებლის შემოღება-გაუქმებასა და მისი ტარიფების განსაზღვრასთან, მოსაკრებლის ადმინისტრირებასთან დაკავშირებულ საკითხებზე;
- მ) საქართველოს კანონმდებლობის და წალკის მუნიციპალიტეტის სამართლებრივი აქტების შესაბამისად სხვა ფუნქციების განხორციელება.

მუხლი 3. სამსახურის მართვა

1. სამსახურის საქმიანობას ხელმძღვანელობს სამსახურის უფროსი. სამსახურის უფროსის უფლებამოსილებები და სამსახურებრივი ფუნქციები განისაზღვრება წალკის მუნიციპალიტეტის გამგეობის დებულებით და სამსახურის უფროსის სამუშაოთა აღწერილობით. უფროსის არყოფნის შემთხვევაში მის უფლება-მოვალეობებს გამგებლის დავალებით ასრულებს სამსახურის ერთ-ერთი სპეციალისტი.
2. სამსახურის მოხელეთა უფლება-მოვალეობანი განისაზღვრება შესაბამისი სამუშაოთა აღწერილობით.
3. სამსახურის მოხელეთა თანამდებობაზე დანიშვნა-გათავისუფლება განისაზღვრება წალკის მუნიციპალიტეტის გამგეობის დებულებით და „საჯარო სამსახურის შესახებ“ საქართველოს კანონით.

მუხლი 4. გარდამავალი დებულებანი

ამ დებულების დამტკიცება , გაუქმება ან მასში ცვლილებების შეტანა ხდება წალკის მუნიციპალიტეტის დადგენილებით.